

**SOALAN NO. 78**

**PEMBERITAHUAN PERTANYAAN DEWAN RAKYAT**

**PERTANYAAN : JAWAB LISAN**

**DARIPADA : DATUK DR. HAJI ABD. LATIFF BIN HAJI AHMAD  
( MERSING )**

**TARIKH : 18 MAC 2014 (SELASA)**

**SOALAN :**

**Datuk Dr. Haji Abd. Latiff bin Haji Ahmad [ Mersing ]** minta **MENTERI PEMBANGUNAN WANITA, KELUARGA DAN MASYARAKAT** menyatakan apakah usaha-usaha yang diambil oleh Kementerian bagi menyuburkan rasa penghargaan, tanggungjawab dan kasih sayang di kalangan generasi muda terhadap golongan ibu bapa.

## **JAWAPAN:**

Tuan Yang Dipertua,

Ibu bapa adalah insan yang paling mulia. Mereka telah bertungkus lumus menjaga dan mendidik kita dari kecil hingga kita dewasa. Pengorbanan dan kasih sayang yang mereka berikan tidak boleh dilupakan oleh semua yang bergelar "anak".

Sebagai langkah untuk menyuburkan rasa penghargaan, tanggungjawab dan kasih sayang di kalangan generasi muda terhadap golongan ibu bapa, Kementerian Pembangunan Wanita, Keluarga dan Masyarakat (KPWKM) melalui Lembaga Penduduk dan Pembangunan Keluarga Negara (LPPKN) telah merencanakan dan melaksanakan pelbagai program. Antaranya ialah:

### **a) Sambutan Hari Ibu dan Hari Bapa**

Sambutan Hari Ibu dan Hari Bapa dilaksanakan sejak tahun 2002 bertujuan untuk meningkatkan kesedaran dalam kalangan

masyarakat untuk menghargai pengorbanan dan kasih sayang ibu dan bapa mereka.

**b) Sambutan Hari Keluarga Kebangsaan**

Sambutan Hari Keluarga Kebangsaan diadakan pada 11 November setiap tahun telah diperluaskan kepada konsep sambutan Bulan Keluarga Kebangsaan yang disambut pada bulan November mulai tahun 2013. Sambutan ini diadakan bagi menggalakkan masyarakat untuk mengutamakan keluarga melalui aktiviti yang dapat menyubur dan merapatkan hubungan ahli keluarga bagi memupuk nilai-nilai murni dan kasih sayang generasi muda terhadap anggota keluarga mereka.

**c) Program Ilmu Keluarga@LPPKN**

Program Ilmu Keluarga@LPPKN merupakan usaha KPWKM untuk memupuk dan menyuburkan rasa tanggungjawab ahli keluarga serta memantapkan institusi keluarga. Program ini memfokuskan kepada tema yang berasaskan kepada Pakej Modul KASIH. Antara pengisian program Ilmu Keluarga@ LPPKN meliputi modul-modul berikut:

- Modul Persediaan Perkahwinan dan Permantapan Perkahwinan (Bahtera Kasih)
- Modul Keibubapan ( Pancaran Kasih)
- Modul Keibubapaan dan Anak Kecil ( Belaian Kasih)
- Modul Keibubapaan dan Anak Remaja (Mutiara Kasih)
- Modul Pembangunan Remaja (Permata Kasih)

Sejak dilaksanakan pada tahun 2006 hingga Disember 2013, sebanyak 10,238 program Ilmu Keluarga@LPPKN telah dilaksanakan yang melibatkan penyertaan seramai 1.15 juta orang peserta. Para peserta turut diberi pengetahuan berkaitan aspek tanggungjawab terhadap anak-anak selain peranan anak-anak untuk menghormati serta menghargai pengorbanan kedua ibu bapa.

Tuan Yang Dipertua,

Usaha untuk meningkatkan penghayatan nilai-nilai murni kekeluargaan memerlukan peranan dan penglibatan semua pihak. Sehubungan itu, KPWKM dan LPPKN akan terus bekerjasama dengan agensi-agensi kerajaan, pertubuhan bukan kerajaan dan

sektor korporat untuk melaksanakan program pembangunan keluarga di peringkat akar umbi.